

## **EFESUS**

### **Pol ere Efesus komri tatame emne bas rasem siglou.**

*Kiyi late tuma.*

Gwote siglou Pol eter bas rasem, ere Efesus komke temenem Kristen tatame emne newopitim. Efesus kom e kantri Turki etek tetan.

Gwote tuma yenbo Pol ere etep bas rasem. God ere akei gwote nowselri wos seikim, akei wosken akei tatameken eme Aneyen Jisas eteri kulke tetan (1:9-10). God ere etep wom, Kristen tatame eme geisimasekap. Eme Ane wurisubu tetan, e Apei God eter. God ere Kristen tatame emne kenem, eme eteri tatame tem. Jisas ere etemri wule yaperke san peten sepitim. Sene ere God Eteri Wou won yam, ere Jisas erne kenawaike abobe tatame emne kwokwos kwokwos kobo labe, eme wule yenbo ek nenbe (1:13-14).

Pol ere God eteri kik tetan tuma somo noub etep wusowum. Krai ere Kristen tatame etemri tare. Kristen tatame eme eteri wusom. Eme Krai eteri kulke tetan (4:1-10). Jisas Krai eterke God ere tatame emne pap yewobe, ere emne noubwai lakerebe. Pol ere etep bas rasem.

*Pol ere Efesus komri tatame emne bas rasem tuma gwote.*

Sapta 1–3. God ere Krai eterke tatame nemne porere ager newom.

Sapta 4–6. Nema Krai eteri wusom, eke nema God eteri wulewou tobote.

<sup>1</sup> An Pol, God ere ane wom, an Krai Jisas eteri aposel yaku kerbe tame tem. Kem Efesus komke tetan God eteri tatame. Kem Krai erne kenawaike som abobe tatame yenbo, an kemne gwote siglou bas rasbe.

<sup>2</sup> An abobe, neremri Apei God eterken Aneyen Jisas Krai eterken epe kemne kobo lan noub nente, kem pap yenbo temente nenbe.

*Krai eterke God ere nemne Hevenri wos yenbo newobe.*

<sup>3</sup> Nema God erne pir won eri sig eisau wobe. Ere Aneyen Jisas Krai eteri Ar, eteri Keryen God. Nema Krai eterken belandeten tatame, eke Hevenri wulek God ere nemne yenbo noub nenbe, neremri selpap yenbo tetan.

<sup>4</sup> Kiyisape God ere nowsel mak seikmenem, ere nemne kenen etep wom. Ari kenem tatame, yuri eme Krai erne kenawaike abote, eteke eme tatame yenbowai tete. Eme wule yaper beke kip nen. An emne etep lakerete nenbe. Ere etep wom.

<sup>5</sup> Kiyisape ere nemne pap yewon nemne pette wom. Ere eteri porerek etep wom. Ete tatame, yuri eme Jisas Krai erne kenawaike abote, etepkap eme areri yen tete. Eteri porerek ere etep wom.

<sup>6</sup> God ere nemne kobo eisau lam. Eteri selpapri Yen adebas, Krai eterke, ere nemne noubwai eyarem. Ere eger beke te. Berai. Ere nemne bepou me noub eyarem, eke nema God eteri sig yenbo eisau wobe.

<sup>7-8</sup> God eri kobo labe wule ere eisauwai. Krai ere sam, eri nep yeirimke, ere neremri wule yaper tuken ere nerem nenbetem wule yaper peten

sepitim. Eteke God ere eteri porere yenbok nemne noubwai eyarem.

<sup>9</sup> God ere nouw abon nemne nente womkap ere nemne yuri peteram. Ere Kraiss eterke nenem wule e kiya me berasmenem.

<sup>10</sup> Eri wom wule gwo. God ere kiya seikim wos nogwape, nowselri wosken nelri wosken ere akei wurisubuk tete. Tete, eme Kraiss eteri kulke temente. God eter wom yabel tete, ere etep nente nenbe.

<sup>11</sup> Be wos be wos tebe, God eter kiyisapek womkap, ete wos ek tebe. Kiya God eter womke, nema Juda tatame nema Kraiss eterken kiya belandem, nema eteri tatame tem.

<sup>12</sup> Nema Kraiss erne kiya kenawaike abobetem tatame, God ere nemne wom, eke nema eteri sig eisau som wobetete.

<sup>13</sup> Sene Juda berai tatame kerem kir kem ete Tuma Yenbo, tuma seken kem meten kem Kraiss erne kenawaike abom, eke God ere kemne sene petem. Etep tem, God ere womkap, ere Eteri Wou kemne newom. Newom, nema metten, kem eteri tatame tem.

<sup>14</sup> Nema God Eteri Wou petem, eke nema metten, God ere eteri tatame emne newote womkap, nema pette nenbe. Yuri tete yabel nema ete wos pette nenbe, eke nema God eteri sig eisau som wobetete.

*Pol ere God erne wometem, God ere Efesus komri tatame emne porere newote.*

<sup>15</sup> An metem, kem Aneyen Jisas erne kenawaike abobe, kem God eri tatame nogwape emne pap yewobe.

<sup>16</sup> An etep metem yabelke, sene kwokwos kwokwos an kemne abon, God erne pir som wobe.

<sup>17</sup> Neremri Aneyen Jisas Kraiss eteri Apei ere mure sapeken Keryen. An erne wolate, ere kemne selpapken porereken yenbo newote, eke eteri tuma, eteri tebekap, kem noub mette.

<sup>18</sup> An erne wolabe, ere kemne gwote wos noub peterate, eke kem noub mette. God ere kemne wom, ere kemne yenbowai eyarte. Ere keremken eteri akeite tatameken kemne wos yenbotanbo newote nenbe. Kem kenawaike abobe tatame, ere kemri selpapke mureken yaku eisau kerebe. Kem etep noub mette, eke an etep wolabe.

<sup>19</sup> Eter nemne kobo labe mure ere sapekenwai, e nowselri mure me teitkwunbe.

<sup>20</sup> Ete mure ere Kraiss erne wou sene newom, ere Hevenke yin God eteri piseit yekwok siten.

<sup>21</sup> Etek Kraiss ere kom panen siten. Akei mureken omugabo, akei apeilake, akei nowselri keryen, akei mureken wos eme eteri kulke tetan. Eteri sig e eisauwai. Gwopte tetan sigken wos, yuri tete sigken wos emne ere teitkwunten.

<sup>22</sup> God ere akei wos nogwape Kraiss eteri tewo kulke petewurem. Petewurem, ere akei wosri Keryen tem. God ere wom. Kraiss ere keremri Keryen eisau. Ere keremri tarekap. Etep wom.

<sup>23</sup> Sios e eteri wusom. Eme eterke ten yaten. Ere akei woske ten yaten. Etep wom.

## 2

*God ere nemne eyarem, eke nema Kraiss eterken san sene wayem.*

<sup>1</sup> Kiyi kem wan gwole ten akeite akeite wule yaper nenbetem, eke kem sa tatamekap temenem.

<sup>2</sup> Etepkap temenem, kem nowselri wule yaper tobobetem. Omugabo etemri keryen eteri tuma kem etep meten tobobetem. Ete keryen ere God eteri tuma naswoibe tatame emri keryen yaper. Ere emne kom panen sibe.

<sup>3</sup> Kiyi nema akei nema etepkap temenem. Nema nemri porere yaper etepwou nenbetem. Nema maima wusomwou abon nenbetem. Etep tebetem, God ere akei tatame yaper emne pap wayen yaper awosein nente womkap, neremne kir, ere nemne etep nente wom.

<sup>4-5</sup> E seken. Nema wule yaperke temenem, nema sa tatamekap temenem. Etep temenem, God ere kobo eisau labe tame, ere nemne kobo lan nemne peten pap yewom. Ere nemne wou sene newom. Ye, God eteri kobo labe wulek ere nemne sene petem.

<sup>6</sup> Nema Krai eterken belandeten, eke God ere Krai erne wou sene newomkap ere nemne sene kir newom, eke nema eterken sin Heven kom kir panen site.

<sup>7</sup> Beke God ere etep nenem? Krai eterke ere nemne kobo kenake lan peten pap yewom. Ete wule yenbo ere yurik tete tatame emne peterate wom, eke ere etep nenem.

<sup>8</sup> Kem Krai erne kenawaike abobe, eke God ere kemne kobo lan kemne sene petem. Kem yaku wuri beke nen. God eteri porerek ere kemne sene petem.

<sup>9</sup> Tatame eme yaku wuri beke kere, eke eme sig maima eisau mapeke wote.

<sup>10</sup> God eter ere yaku eisau kerem, eke nema tatame yenbo tem. Krai Jisas eterke nema tatame ager ten nema yaku yenbo kerete. God ere nemne ete yaku kerete kiyi wom.

*Krais eterke tame beig pes wurisubuk belandeten.*

<sup>11</sup> Kemri kiyi temenemkap kem abote. Kem Juda tatame berai, kem akeite tatame. Juda tame eme somo kwunbe, eke eme kemne lan etep wobe. Eme somo beke kwun tame. Etep wobe. Somo kwun wule e tame letke nenbe wule.

<sup>12</sup> Kiyi kem Krai eterken beke te. Kem erne genek temenem. Kem Israel etemri peiktamekap temenem. God ere Israel etemne kobo lan namderasem tuma kem mak metmenem, eke kem sate akbetem, kem pap yaper temenem. Kem God erne beke abo. Kem nowselke bepou me temenem.

<sup>13</sup> Kiyi kem genewaike temenem. Gwopte kem Krai Jisas eterken belandeten. Krai eteri nepke kem God eterken mekinke yam tetan.

<sup>14</sup> Krai eter ere nemne pap yenbo metbe wule newon nema Juda tatame etemken ei geruwum. Kiyi nema etemken kenakena temenem, e ser borke pemenemkap, Krai ere nemne kobo lan sam, ete ser ere akei bera seitim, eke sene Juda tatameken Juda berai tatameken eme peiktamekap sene beke te. Eme tame beig wurisubuk tem.

<sup>15</sup> Krai eteri nepke ere Juda etemri eikina abona wule nogwape akei peten sepitim. Etep tem, ere Juda tatameken akeite tatameken emne

peten eme eterken belandem. Eterken belandeten, eme tame beig wurisubuk tem. Etep tem, eme peiktamekap sene beke te.

<sup>16</sup> Krais ere kwuran kwanem mek samke, ere etemri pap wayebe wuleken ei naibe wuleken akei teitkwunem. Etepke Juda tatameken Juda berai tatameken eme wurisubuk belandeten. Belandeten, God ere emne sene petem, eme eteri tatame tem.

<sup>17</sup> Ye, Krais ere yan ei gerube tuma wusoubetem. Genek temenem Juda berai tatame eme ete tuma metem, mekinke temenem Juda tatame eme ete tuma kir metem.

<sup>18</sup> Krais eterke nema Juda tatameken kem Juda berai tatameken nema God Eteri Wou petem, eke nema God eterken kuyese tuma namdebe.

*Nema Kristen, nema God eteri ake sekenwai.*

<sup>19</sup> Kem Juda tatame berai, kiyi kem God erne beke met, kem eteri tatame beke te. Kem ek ya akeite tatamekap temenem. Sene berai. Gwopte kem God eteri tatame tem. Gwotepte kem akeite Kristen etemken kem God eteri tame beig wurisubuk tetan.

<sup>20</sup> Kem God eter kerem akekap. Kiyi temenem tuma wusoubetem tameken aposel tameken eme teban kwatkap. Jisas Krais eter ere nawo kwatkap.

<sup>21</sup> Nema Krais eterken belandeten, etepkap e ake ere noubwai tetten. God ere ete ake yaku som kerebe. Ete ake ere eisauwai tebe. E Aneyen eteri ake yenbosubuwai.

<sup>22</sup> Kerem kir, kem Krais eterken belandeten. God ere kemne akeite Kristen emne peten

wurisubuk belandebe, kem eteri ake yenbokap tebe. God Eteri Wou ere etek tetan.

### 3

*Pol ere Juda berai tatame emne God eri tuma wusoubetem.*

<sup>1</sup> Kem Juda berai tatame, God ere kemne arenke kobo lam, eke an ake yaperke tetan. An Krai Jisas eteri tuma wusoubetem, eke eme ane ake yaperke won wurim.

<sup>2</sup> An abobe, kem etep metten, God ere ane kobo lan ane ete yaku newom. Ere kemne noub abon, eke ere ane ete yaku newom.

<sup>3</sup> God ere Juda berai tatame emne kir peten eme eteri tatame tete tuma e kiyi me berasmenem. Ete tuma God ere ane wusowum. An kemne ete tuma kiyi kera bas rasem.

<sup>4</sup> Kem etep lan, kem abote. Krai eter nenbetemkap ete tuma Pol ere noub metten. Nogwape tatame eme ete tuma beke met.

<sup>5</sup> Kiyi temenem tatame eme God eri etek berasmenem tuma ere emne beke petera. Gwopte God Eri Wou ere ete tuma God eri aposel tameken eteri tuma wusou tameken emne wusowum.

<sup>6</sup> Kiyi berasmenem tuma ere gwopkap. Juda berai tatame etemken kir, eme God Eteri Tuma Yenbo kenawaike mette, eme Juda tatameken eme God eteri tame beig tete. Etem kir eme Krai Jisas eteri wusom tete. Etepkap, Krai eterke God ere eter kiyi namderasem tumakap ere etemken Juda tatame etemken kir noub eyarte nenbe.



<sup>7</sup> God ere ane ete Tuma Yenbo wusoute yaku newom. Ere ane kobo lan eri mure ane newom, eke an ete yaku muresen kerebe.

<sup>8</sup> An abobe, an tame yenbo berai. God eteri tatame nogwape eme yenbo, eme ane teitkwunten. Etep tem, God ere ane kobo lan Tuma Yenbo Juda berai tatame emne wusoute yaku newom. Krai eter yenbosubuwai tetangkap an emne wusoube.

<sup>9</sup> Akei wos seikim, God ere kiyi berasem wule nentekap an nogwape tatame emne nouwoube.

<sup>10</sup> Etepkap, God eteri tatame eme God eteri metke rake porere eme gwoteptek nouwoube mette. Sene God eteri komri tameken nelri keryenken etem kir eme etep lan mette.

<sup>11</sup> God eter kiyi abon nente womkap ere neremri Aneyen Krai Jisas eterke ere etep nenem.

<sup>12</sup> Nema Krai eterken belandeten tatame, nema erne kenawaike abobe, eke nema beke kip ak, nema God erne mekinke yin eterken tuma namdebe.

<sup>13</sup> Eke an kemne wobe, kem abobe, an kemne kobo lan mus metbekap, kem pap yaper mane mette. Kem etepke abote, an kemne kobo labe, eke kem God eterken eyar tetan.

*Pol ere Apei erken tuma etep namdebe, Efesus tatame eme mureken temente.*

<sup>14</sup> Apei God eteri nenbekap an etep abobe, an erne gulke pan sukye worabe.

<sup>15</sup> God ere akei wakse etemri Apei. Ere akei nowselri wakseken nelri wakseken emne sig newom.

<sup>16</sup> God ere tatame emne noub nenbe wule nogwapewai tetan. Eke an erne wolabe, ere Eteri Wouke kemri selpap mure eisau newobetete.

<sup>17</sup> Eke kem KraiS erne kenawaike abon ere keremri selpapke temente nenbe. Me eisau eri nen kik waren me noub tetbekap, kem KraiS eri pap yewobe wule sen noub tette.

<sup>18</sup> Eke KraiS ere nemne pap kenawai som yewobekap, kerem kem God eri tatame nogwape etemken kem akei, kem etep noub metbetete.

<sup>19</sup> Ye, kem eteri pap yewobe wule noub mette. (Ete wule eisauwai nema mapeke noub mette.) Kem noub mette, eke God eter tetangkap, kem etepkap tete.

<sup>20</sup> Nema God eteri sig eisau wobe. Eteri mure e neremke yaku kerebe. Be wos nema pette abobe, be wos nema erne wometbe, ere kuyese nemne dagerubuken newobe.

<sup>21</sup> Kwokwos kwokwos nema God eteri sig eisauwai wobetete. God eteri siosri tatameken nema KraiS Jisas eterke nema eteri sig eisau som wobetete. E sekenwai. Nema kir teye.

## 4

### *Nema Kristen tatame nema KraiS eteri wusom.*

<sup>1</sup> An Aneyen eteri yaku kerebetem, eke an ake yaperke tetan. Eke, an kemne etep wobe. God ere kemne wopeten kem gwote selri wule yaper mesginin kem eteri tatame tem. Eke kem God eteri wule som noub tobobetete.

<sup>2</sup> Kem gwopke tete. Kem kemri sig eisau maimane mane wote, kem e tatame emne elen me eyarte,

kem emne tuma koubkoub mane wote. Kem awoawo elen me ten pap yewote.

<sup>3</sup> God Eteri Wouke nema wurisubuk tem. Eke kem yaku noub keren ete wule som tobon pap yenbo tete. Etepkap, kem wakse wurisubu som temente.

<sup>4</sup> Nema Kraiss eteri wusom wurisubu. God Eteri Wou ere wurisubu. God ere nemne kenem, Hevenke yite wom. Nema porere wurisubuk ten etek yite abobe.

<sup>5</sup> Nema Aneyen wurisubuke tetan. God erne kenawaike abobe wule, ete wule e wurisubu. Baptais ok wirube wule etepwou e wurisubu tetan.

<sup>6</sup> Keryen God ere wurisubuke tetan. Ere tatame nogwape etemri Apei. Tatame nogwape eme eteri kulke tetan. Ere tatame nogwape etemken tetan. Ere etemri selpapke tetan.

<sup>7</sup> Kraiss ere pap mame tame, eke ere nemne mure yenbowai newobe. Eter womkap, nema wurare wurare ete mure petem.

<sup>8</sup> God eteri tuma etep wom.

Ere eipiyewaike yawomke, ere eri keresukten tatame nogwape emne panen yawom. Sene ere tatame emne mure newom.

God eteri tuma etep wom.

<sup>9</sup> Ere eipiyewaike yawom tuma somo gwo. Kiyi Kraiss ere Heven mesginin yeirin ere sel kik tetan emik warem.

<sup>10</sup> Etek warem, eter ere sene wayem, ere nel eipiyewai tetan emik yawom. Eke ere selken nelken ten yaten emik tetan.

<sup>11</sup> Eter, ere tatame emne yaku kerete mure newom. Kau ere emne aposel yaku kerete mure newom. Kau ere emne God eri tuma wusoute

mure newom. Kau ere emne kom komke sewuren Kraisi eri Tuma Yenbo wusoute mure newom. Kau ere emne Kristen tatame emne nou b lakerete mure newom. Kau ere emne tisa yaku kerete mure newom.

<sup>12</sup> Kraisi ere God eteri tatame akei emne etepkap mure newom, eke eme God eteri yaku kuyese kerebe. Etep tebe, Kraisi eteri wusom moyen eisau ten mureken tebe.

<sup>13</sup> Etep tebe, nema wurisubuk ten kenawaike abobe wule kir ten God Eteri Yen wurisubu erne nouwai mette. Etepkap nema Kristen sespe ten Kraisi eterkap tebetete.

<sup>14</sup> Eke nema apuleyenkap sene beke kip te. Apuleyen eme ok sare yan pere liger agerbekap. Eme poli yan me take sen yibekap. Eme yikwokwobe tame etemri ek wo ek wo tuma wan wurik metbe. Ete tame eme yikwokwobe porereken eme tatame emne wule yaper eteri keluke panen yibe. Nema etemri tuma metbe yenkap berai.

<sup>15</sup> Nema etepkap tuma wan beke kip ras. Nema tatame emne pap yewon tuma seken wobetete, eke nema Kraisi eterke sespe tete. Ere neremri tare.

<sup>16</sup> Nema eteri wusom, nema eteri kulke tetan. Nema eteri letewoken bitimi ragiken nema akei kir tem. Akei kir natiren wurisubuk tem. Eke nema wurare wurare nema God eter wom yaku kir kerebe. Eke wusom ere pap yewobe wuleken moyen eisau tebe.

*Kristen eme wule ager peten sete.*

<sup>17</sup> Aneyen eteri sigke an kemne eisa eisa wobe. God erne beke abo tatame etemri tebekap kem sene mane etep tete. Etemri abobekap e yaper.

18 Emri porere kerneirikap tetan. God eri newobe porere ager eme pette mo wobe. Eke eme eikse aksen, eme wan gwolebe,

19 eme wule yaper nenbe eme sebera beke ya. Eme epkap epkap wule yaperwou som nenbe.

20 E Krai eteri wule beraiwai. Kristen apeilake eme kemne ete wule yaper beke wusou.

21 An abobe, kem Krai eri tuma noub metbetem. Jisas eri tuma seken, eme kemne wusoubetem.

22 Kiyi kem porere yaper tobobetem. Ete porere yaperke kem yikwokwobe wule nenbetem, kem wos yaper pap wayebetem, eke kem yaper tebetem. Kem ete porere yaper peten sepitte.

23 Kem porere selpap ager tete.

24 Kem tatame ager tete. E God eter seikbe tatame. Eme God eterkap. Eme wule seken yenbowai tobobe.

25 Kem tuma yikwokwobe wule mesginte. Nema Kristen, nema Krai eteri wusom wurisubu tetan. Etepkap, kem akei, kem tuma seken Kristen geisimase emne wobetete.

26 Kem pap wayete, kem wule yaper mane nente. Kem pap mane som wayete. Kem pap som wayen yabelken warte wurken.

27 Satan ere kemne seilate kelu kem erne mane keyen yate.

28 Sir petbe tatame eme sir sene mane pette. Eme yaku yenbo letke kerete. Etep kerete, eme wos eikse te tatame emne kobo lan wos emne kuyese newobetete.

29 Kem bebe tuma yaper mane wote. Kem tuma yenboken tatame emne kobo labe tumaken etep-

wou wote. Eke kem emne yenbo nente.

<sup>30</sup> Kerem tebekap God Eteri Wou ere pap yaper tete wurken. God Eteri Wouke tetan tatame eme God eteri tatame. Yuri tete yabelke God ere ete tatame emne sene pette.

<sup>31</sup> Kem tatame emne sene pap yaper mane tete. Kem emne sene pap mane wayete. Kem etemken eiken mane naite. Kem koubkoub tuma sene mane wote. Kem workwoyeken sene mane reste. Kem emne wule yaper sene mane abote. Ete wule kem sepitte.

<sup>32</sup> Kem awoawo kobo lan noub eyarte. Krai eterke God ere kemri nenbetem wule yaper magelke rasem, eke ere kemne tuma beke kip namde. Etepkap, tatame eme kemne wule yaper nente, kem emne tuma mane namdete. Kem ete tuma magelke raste.

## 5

### *Nema Jisas eter kereten tuke sewurbetete.*

<sup>1</sup> Kem God eteri yen adebas, eke eter tebekap kem etep tebetete.

<sup>2</sup> Kem pap yewobe wule noub tobobetete. Krai ere nemne pap yewobe wule peteram. Ere nemne pap yewon nemri wule yaperke sam. Sam, e God erne kwar pen bos yenbo yamkap. Eke, kerem kir, kem pap yewobe wule noub tobobetete.

<sup>3</sup> Kem sir mane yite, kem yapersaper wule mane nente, kem wos mane malte. Kem God eteri tatame, eke kem ete wule yaper mane namdete.

<sup>4</sup> Kem tuma yaper mane wote, yogwu mane wotoute, sou tuma yaper mane namdete. Epkap

epkap tuma wobe, e yaper. Kem God erne pir wobetete, e yenbo.

<sup>5</sup> Kem noub metten, sir yibe tatame, wule yaper nenbe tatame, wos malbe tatame eme Krai eterken God eri panen siten komke eme beke kip yi. Metye. Kel o be wos malbe tame eme sukye yaper worabe tamekap.

<sup>6</sup> Yikwokwobe tatame etemri tuma yaper kem mane mette. Ete tatame eme God eteri wule beke tobo. God ere etepkap tatame emne pap wayen yaper nente nenbe.

<sup>7</sup> Kem etepkap tatame etemken mane gerete.

<sup>8</sup> Kiyi kem kerneirikapke temenem. Sene kem Aneyen eter kereten tuke tetan. Eke kem ete tuke tetan tatamekap sewurte.

<sup>9</sup> Ete tuke sewurbe tatame eme wule yenbo tobobe, eme God eteri wule seken som tobobe.

<sup>10</sup> Aneyen eter metekwasbe wule kem etepkap porereke pette.

<sup>11</sup> Kerneirikap teketeten wule kem mane tobote. Ete wule yaper tete nenbe. Ete wule yaper kem genik wusoute, tatame nogwape eme ek mette.

<sup>12</sup> Etem berasen nenbe wule yaper nema kuyese beke kip wusou. Nema sebera yate.

<sup>13</sup> Akei wos genik tete, nema ete wos noub kuyese late.

<sup>14</sup> Noub kuyese labe wos e yabel genikap. Etepkap tatame kau eme etep wobe.

Tuknaten tame ne wayen site.

Ne sele meike wayen yite.

Krais eter kereten tu ere nerenke tegetete.

<sup>15</sup> Etepkap, be wos kem nente, kem noub abon nente. Porere berai tame etem nenbekap, kem

etepkap mane tete. Porere tetan tame etem nen-bekap, kem etepke tobobetete.

<sup>16</sup> Gwotepte wule yaper nogwape tetan, eke kem noub abon wule yenbo nogwape gwoteptek nente.

<sup>17</sup> Kem porere eikseten tamekap mane tete. God ere kemne wobekap kem noub mette.

<sup>18</sup> Kem ok yaper nogwape mane an sisipen bele-balete. Etep tebe tatame eme yaper tebe. Kem God Eteri Wou eteri kulke som temente.

<sup>19</sup> Kem Devit eter bas rasem sekwo awoawo wusoubetete. Kristen sekwo ken God Eteri Wou ere kemne newobe sekwo ken awoawo wusoubetete. Kem Aneyen erne abon ete sekwo ek lombetete. Kemri selpapke ete sekwo kem kir lombetete.

<sup>20</sup> Be wos yenbo be wos yaper kemne tete, kem kwokwos kwokwos neremri Aneyen Jisas Kraiss eteri sigke Apei God erne pir wobetete.

*Pol ere taken tame, tameken ta etemne wom tuma.*

<sup>21</sup> Kem Kraiss eterne kenawaike abobe tatame, eke kem tuma awoawo meten tobote.

<sup>22</sup> Kem ta, kem Aneyen eteri kulke tetangkap kem keremri tame emri kulke kir temente.

<sup>23</sup> Kraiss ere sios etemri tare, etepkap tame ere eteri ta etetri tare. Sios eme Kraiss eteri wusom. Ere emne sene petem.

<sup>24</sup> Eke Kraiss eri tatame eme eri kulke tetangkap, kem ta, kem kemri tame etemri kulke temente.

<sup>25</sup> Kem tame, kem keremri ta emne pap yewon metekwaste. Kraiss ere eteri tatame emne pap yewon emne kobo lan samkap, kem kemri ta emne kobo etepke late.



<sup>26</sup> Eteri tumaken baptais ok wirube wuleken Kraiss ere tatame emne ok wiruwum, eme God eteri tatame yenbo ek tem.

<sup>27</sup> Kraiss eter abobekap eteri tatame eme yenbo-subuwai tete. Eme eteri bitimik teten ere emne yenbo labe. Eme wos yaper beke wuri te.

<sup>28</sup> Tame kem keremri wusom maime noub eyarbekap, kem keremri ta emne etepke eyarte. Tame ere ta tene pap yewon noub eyarbe, ere eteri wusom maime pap yewon noub eyarbe.

<sup>29</sup> Eike tame wuri eri wusom maime yaper bekenen. Berai. Ere maime awos newon an noub eyarbe. Kraiss ere eteri sios tatame emne etepke tebe.

<sup>30</sup> Nema eteri wusom, eke ere nemne noub eyarbe.

<sup>31</sup> God eteri tuma etep wobe. Etepkap, tame ere anenawo mesginin ta panebe, epe wusom wurisubuk tebe. Etep wobe.

<sup>32</sup> Etek bas rasten tuma seken wuri e me berasten. An abobe, ete tuma eri somo e Kraiss eterken eteri sios etemken wobe. Kraiss ere tamekap. Erne kenawaike abobe tatame eme eteri takap. Eme wusom wurisubuk tetan.

<sup>33</sup> Etepkap, kem tame, kem kerem maime pap yewon noub eyarbekap, kem keremri ta emne etepwou eyarbetete. Kem ta, kem tame emri sig yenbo wobetete.

## 6

*Pol ere anenawoken yen etemken etemne wobe tuma.*

<sup>1</sup> Kem yen, kem anenawo etemri tuma wan wurik metbetete. E Aneyen eteri wule yenbo.

<sup>2</sup> God eteri tuma etep wobe. Ne anenawo etepri tuma meten, etepri kulke temente. Ete wule e God eterken namderasem tuma kir tetan.

<sup>3</sup> Namderasem tuma ere gwo. Ne etep nente, ne noub ten nabe nogwape temente. Etep wobe.

<sup>4</sup> Anenawo, kem yen emri porere yaper mane nenen, eme kemne pap wayete. Kem emne Aneyen eteri wule noub wusowun peterabetete.

*Yaku kerebe tatameken yaku lakerebe tatameken etemne wobe tuma.*

<sup>5</sup> Kem yaku kerebe tatame, kem keremri yaku lakerebe tatame emne aken emri tuma akei noub meten tobobetete. Kem Kraiss erne abon etemri yaku noub kerebetete.

<sup>6</sup> Yaku lakerebe tame eme kemne sig yenbo wote, kem mane eteke abon yaku yenbo etemri bitimiwouke mane kerete. E yaper. Kem etep abote. Nema Kraiss eteri yaku kerebe tatame. God eter wobekap nema papke abon yaku muremare sen ek kerebetete.

<sup>7</sup> Kem yaku kerebe tatame, kem metekwasen yaku keren etep abobetete. Nema nowselri tatame emri yakuwou beke kere. Berai. Nema Aneyen eteri yaku kir kerebe.

<sup>8</sup> Kem abopitte, be yaku yenbo nema kerebe, Aneyen ere nemne etepkap wos yenbo awosein nente nenbe. Yaku kerebe tatameken yaku lakerebe tatameken emne ere etep nente. Kem etepke abobetete.

<sup>9</sup> Kem yaku lakerebe tame, kem keremri yaku kerebe tatame emne etepwou tebetete. Kem emne awosein yaper nente tuma mane wote. Kem metem, Aneyen Jisas ere Hevenke tetan,

ere keremri Aneyen. Ere yaku kerebe tatame etemri Aneyen kir. Ere keremken etemken wule kenakena beke nen. Berai. Ere nemne wule wurisubuk nenbe.

*Kristen eme ei nai tamekap.*

<sup>10</sup> Tuma tep kera tetan. Kem Aneyen eterke muresen tete. Eri mure sapeken kem pette.

<sup>11</sup> God ere kemne newobe ei naibe wos akei kem pette. Eke Satan ere kemne yikwokwon seilate, kem kuyese muresen noub tette.

<sup>12</sup> Nema more tatame etemken ei beke nai. Berai. Nema kerneirik siten keryenken kom panen sibe tameken nowselri mureken wos yaper etemken ei naibe. Nema nelke tetan mureken omugabo sikiliwas yaper etemken ei naibe.

<sup>13</sup> Eke, God ere kemne newobe ei naibe wos akei kem gwotepte pette. Eke ete peiktame eme yate nenbe yabelke kem muresen teten kuyese etemken nayin omote. Omotek, kem muresen som tette.

<sup>14</sup> Ye, kem gwopke tete. Ei nai tame eme somokep sibekap, kem tuma seken eri wule peten sebetete. Ei nai tame eme siot kapa wusom subbekap, kem yenbo nenbe wule peten sebetete.

<sup>15</sup> Ei nai tame eme tewo oub wun ek yibekap, God eteri pap noub nenbe Tuma Yenbo kem etep kiya noub abon ek yin wusoubetete.

<sup>16</sup> Ei nai tame eme wol sebekap, kem kenawaike abobe wule etepke peten sebetete. Ete wol kem sete, tame yaper, Satan, ere kemne kerken piken metaken kemne kilin pete nenbe, ete piken metaken eme ete wolke yawon kerken sate nenbe.

<sup>17</sup> Ei nai tame eme hat kapa tarek rubekap, God ere kemne sene petbe wule kem peten sebetete. Sene ei nai tame eme pi sebekap, kem God Eteri Wou eri pi peten sebetete. Ete pi e God eteri tuma.

<sup>18</sup> Kwokwos kwokwos kem God Eteri Wou eri murek God erken tuma namdebetete. Be tuma be tuma kem eterken som namdebetete. Kem boulsen mane ten mesginte. Kem Kristen nog-wape emne abon God erne womettek, ere emne kobo late.

<sup>19</sup> Arene kir, kem ane abon God erne wometbetete, ere ane wusoube tuma an muresen emne wusoubetete. God eteri berasmenem Tuma Yenbo an emne nouw wusoubetete. Kem erne etep wometbetete.

<sup>20</sup> An God eteri tuma wusoube tame, an ete tuma wusou yaku kerebe, eme ane keresukun ake yaperke wun wurim tetan. An gwotek tetan, ari yaku som tetan. Etepkap, kem ane abon God erne etep womette. Pol ere mane akte, ere neri tuma kuyese muresen wusoubetete. Etep womette.

*Pol ere God erne wometem, ere emne eyarte.*

<sup>21</sup> Aren tetangkap, aren nenbekap, Tikikus ere kemne akei wusoute. Ere neremri mase yenbo. Kwokwos kwokwos ere Aneyen eteri yaku nouw kerebe.

<sup>22</sup> Eke an erne won ere kemne yan late, nerem tetan tumaken pap yenbo tete tumaken ere kemne etep wusoute.

<sup>23</sup> Apei Godken Aneyen Jisas Kraisken epri pap yenbo tebe wule, pap yewobe wule, kenawaike abobe wule akei epe Kristen geisimase emne newote.

<sup>24</sup> Neremri Aneyen Jisas Krais erne som pap yewobe tatame, erne beke mesgin tatame etemne God ere emne kobo lan noub eyarbetete.  
Pol ere bas rasem tuma ab eteke.

**GOD ETER AGERKE NAMDERASEM TUMA  
YENBO**

**The New Testament in the Yawu Dialect of the  
Yessan-Mayo Language of Papua New Guinea  
Nupela Testamen long tokples Yawu long Niugini**

copyright © 1996 Wycliffe Bible Translators, Inc.

Language: Yawu (Yessan-Mayo) (Yessan-Mayo)

Dialect: Yawu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

61a9dc70-9585-5876-8394-faa75a1766e5